



Broj: 01/3-50-1-25-21/05  
Sarajevo, 17. maja 2005. godine

**Z A P I S N I K**  
**21. sjednice Komisije za vanjsku trgovinu i carine**  
**Predstavničkog doma Parlamentarne skupštine BiH,**  
**održane 17. maja 2005. godine**

Sjednica je počela u 8:30.

Sjednicom je predsjedavao Petar Kunić, predsjedavajući Komisije.

Sjednici su prisustvovali: Marija Perkanović, Mladen Potočnik, Fatima Leho, Izet Hadžić i Dušanka Majkić.

Opravdano odsustvovali sa sjednice: Filip Andrić, Azra Hadžiahmetović i Ibrahim Đedović.

Sjednici su prisustvovali: Čedomir Ljuboje, šef Odjeljenja za carinsku tarifu u Ministarstvu vanjske trgovine i ekonomskih odnosa i Emira Češljarić, sekretar Komisije.

Za sjednicu Komisije je predložen i jednoglasno usvojen sljedeći

**D N E V N I R E D**

1. Usvajanje Zapisnika 20. sjednice Komisije
2. Konačan stav Komisije o Prijedlogu zakona o izmjeni Zakona o carinskoj tarifi Bosne i Hercegovine radi dostavljanja u parlamentarnu proceduru na razmatranje i usvajanje
3. Razmatranje Informacije o rezultatima primjene implementacije Zakona o dopunama Zakona o carinskoj tarifi Bosne i Hercegovine, koji se odnosi na uvoz mesa, (Ministarstvo vanjske trgovine i ekonomskih odnosa dostavilo 21.4. 2005. po Zaključku 53. sjednice Predstavničkog doma)
4. Razmatranje dopisa načelnika općine Gradiška upućenog i Komisiji, u vezi posredovanja kod sufinansiranja u rješavanju funkcioniranja graničnog prijelaza
5. Tekuća pitanja.

**Ad-1**

Zapisnik 20. sjednice Komisije usvojen je jednoglasno, bez primjedbi.

**Ad-2**

**Konačan stav Komisije o Prijedlogu zakona o izmjeni Zakona o carinskoj tarifi Bosne i Hercegovine radi dostavljanja u parlamentarnu proceduru na razmatranje i usvajanje**

Sekretar Komisije upoznala je prisutne o hronologiji aktivnosti Komisije o ovoj tački.

Inicijativu za izmjenu Zakona predložila je Dušanka Majkić na 17. sjednici Komisije održanoj 3.2.2005.godine i Komisija je, u međuvremenu, poštujući poslovničku i zakonsku proceduru dobila odobrenje Upravnog odbora Uprave za indirektno oporezivanje 29. 3. 2005. godine za izmjenu Zakona kao i zaključak Vijeća ministara od 12.4. 2005. godine s mišljenjem resornog ministarstva da se može prihvatiti mišljenje Ministarstva vanjske trgovine i ekonomskih odnosa za izmjenu Zakona o carinskoj tarifi Bosne i Hercegovine.

Komisija je utvrdila konačan tekst Prijedloga Zakona o izmjeni Zakona o carinskoj tarifi Bosne i Hercegovine i jednoglasno **z a k l j u č i l a** da Predstavničkom domu dostavi Prijedlog zakona o izmjeni Zakona o carinskoj tarifi Bosne i Hercegovine na razmatranje i usvajanje po hitnom postupku na osnovu člana 105. Poslovnika Predstavničkog doma.

### **Ad-3**

**Razmatranje Informacije o rezultatima primjene dopuna Zakona o carinskoj tarifi Bosne i Hercegovine, koji se odnosi na uvoz mesa,** ( Ministarstvo vanjske trgovine i ekonomskih odnosa dostavilo 21.4. 2005. po Zaključku 53. sjednice Predstavničkog doma)

Uvodne nepomene o Informaciji dao je Čedomir Ljuboje ispred Ministarstva vanjske trgovine i ekonomskih odnosa, obrađivača Informacije, parafrazirajući sadržaj iste, istakavši da je Parlamentarna skupština usvojila izmjene Zakona, koji je stupio na snagu 23.7.2004. godine, a prvo rješenje za povlačenje tarifnih kvota izdato je 1.10.2004. godine. Osnovni razlog za otvaranje tarifnih kvota sastojao se u činjenici da je potrebno poboljšati uvjete u preradi mesa i kod domaćih primarnih poljoprivrednih proizvođača, jer je zbog uvoza prerađevina od mesa po ugovorima o slobodnoj trgovini bez plaćanja carine prijetila opasnost da se zaustavi domaća proizvodnja. Korištenje uvoznih tarifnih kvota veže se za otkup domaće primarne proizvodnje u određenim omjerima za pileće, goveđe i svinjsko meso. Prema odredbama Zakona, Vijeće ministara može maksimalno četiri puta godišnje ponoviti utvrđene kvote za pojedine tarifne oznake. Na ovaj način Vijeće ministara, u izvjesnoj mjeri, može voditi aktivnu politiku stimulisanja proizvodnje u domaćoj poljoprivrednoj primarnoj proizvodnji i u preradi mesa.

Napomenuo je da kvote do kraja 2004. godine nisu upotpunosti iskorištene, izuzev odobrenih kvota za pileće meso, i bilo bi dobro da se utvrdi kojim brojem se raspolaže u BiH sa stanjem otkupa žive stoke koja je namijenjena za preradu u mesnoj industriji, pa je predloženo da se, u cilju stimulisanja ratarske i stočarske proizvodnje, otvore, po postupku predviđenom zakonom, tarifne kvote za uvoz bez plaćanja carine određenih količina tovnje junadi od 160-300 kg težine, prasadi do 50 kg težine i janjadi (do jedne godine). Ovu informaciju je razmatralo i usvojilo Vijeće ministara na 80. sjednici, održanoj 6.4. 2005.godine, uz zaključak da Uprava za indirektno oporezivanje treba da do 15. u tekućem mjesecu dostavlja Ministarstvu vanjske trgovine i ekonomskih odnosa Bosne i Hercegovine sve relevantne podatke o korištenju tarifnih kvota za prethodni mjesec.

U veoma sadržajnoj raspravi u kojoj su učestvovali: Dušanka Majkić, Mladen Potočnik, Petar Kunić i Fatima Leho konstatirano je da je izmjena Zakona 2004. godine bila usmjerena samo za interes određenih proizvođača mesne industrije i da je to bilo parcijalno rješenje koje nije dalo očekivane rezultate, radi čega bi bilo potrebno, naravno, kroz izmjenu zakona rješavati cjelokupne interese proizvođača i prerađivača u mesnoj industriji.

Postoje saznanja da meso koje se uvozilo po odobrenim kvotama nije korišteno isključivo za preradu nego se nalazilo i u prodaji. Također, u BiH ne postoji podatak koliko ima domaće tovnje stoke za otkup.

Imajući u vidu zapažanja i podatke koji su navedeni u raspravi po osnovu navedene Informacije, a u cilju zaštite interesa cjelokupne poljoprivredne proizvodnje u BiH, stimulisanja domaće ne samo mesoprerađivačke nego i stočarske proizvodnje, Komisija je jednoglasno **z a k l j u č i l a** da:

na osnovu navedene Informacije Ministarstva vanjske trgovine i ekonomskih odnosa Komisija obavi javnu raspravu na koju bi se pozvali predstavnici Vijeća

ministara BiH (resornog ministarstva), entitetskih vlada, granskih udruženja pri komorama u Federaciji BiH i Republici Srpskoj, Ureda za veterinarstvo i Vanjskotrgovinske komore BiH, Veterinarskog fakulteta iz Sarajeva i Banje Luke, i predstavnici drugih zainteresiranih meritornih udruženja.

Rasprava bi se održala u zgradi institucija BiH (najvjerovatnije dan prije narednog zasjedanja Predstavničkog doma).

Nakon obavljene rasprave, Komisija će sačiniti zaključke i dostaviti ih Predstavničkom domu u formi izvještaja.

#### **Ad-4**

##### **Razmatranje dopisa načelnika općine Gradiška upućenog i Komisiji, u vezi posredovanja kod sufinansiranja u rješavanju funkcioniranja graničnog prijelaza**

Načelnik općine Gradiška uputio je i ovoj Komisiji kopiju zahtjeva, upućenog Upravnom odboru Uptave za indirektno oporezivanje, s molbom za posredovanje u rješavanju problema graničnog prijelaza u Gradišci.

Navedeno je da je granični prijelaz jedan od najvećih u BiH; da se nalazi u centru grada i zbog velikih gužvi koje uzrokuju teški kamioni (koji koriste usluge carinskog terminala) onemogućeni su organizacija i funkcionisanje života u gradu.

S obzirom da je ovaj granični prijelaz postao ograničavajući faktor prostornog razvoja općine, da lokalna zajednica ne raspolaže alternativnim sredstvima za tekuće i investiciono održavanje saobraćajnica i infrastrukture, Komisija je **z a k l j u č i l a** da:

- preporuči Upravi za indirektno oporezivanje da detaljno sagleda stanje na graničnom prelazu Gradiška i predloži mjere za prevazilaženje ovakvog stanja, i
- predloži Upravi za indirektno oporezivanje da razmotri mogućnost podjele prihoda ostvarenog po osnovu pružanja usluga carinskih terminala, te u odgovarajućem omjeru izvrši podjelu istog sa općinom Gradiška.

#### **Ad-5**

##### **Tekuća pitanja**

Pod tačkom nije bilo prijedloga.

Sjednica je završena u 10:00 sati.

Sekretar Komisije  
Emira Češljarić

Predsjedavajući Komisije  
dr Petar Kunić